



Broj: UP-03-26-1-017-30/22  
Sarajevo, 26.1.2023. godine

Konkurencijsko vijeće Bosne i Hercegovine, na osnovu člana 25. stav (1) tačka e), člana 42. stav (2), a u vezi s članom 12. Zakona o konkurenciji („Službeni glasnik Bosne i Hercegovine“, broj 48/05, 76/07 i 80/09), rješavajući po Prijavi koncentracije privrednog subjekta „Preduzeće za proizvodnju i promet vode Vlasinka“ doo Beograd, Republika Srbija, zaprimljenoj dana 26.7.2022. godine, pod brojem: UP-03-26-1-017-1/22, na 114. sjednici održanoj dana 26.1.2023.godine, donijelo je

### **Z A K L J U Č A K**

1. Odbacuje se Prijava koncentracije privrednog subjekta „Preduzeće za proizvodnju i promet vode Vlasinka“ doo Beograd, Republika Srbija, radi nepostojanja koncentracije u smislu člana 12. stav (1) Zakona o konkurenciji.
2. Obavezuje se privredni subjekt „Preduzeće za proizvodnju i promet vode Vlasinka“ doo Batajnički drum br. 14-16, 11080 Zemun, Beograd, Republika Srbija, da uplati administrativnu taksu u iznosu od 1.000,00 KM (hiljadukonvertibilnihmaraka) u korist Budžeta institucija Bosne i Hercegovine.
3. Ovaj Zaključak bit će objavljen u „Službenom glasniku Bosne i Hercegovine“, službenim glasilima entiteta i Brčko distrikta Bosne i Hercegovine.

### **O b r a z l o ž e n j e**

Konkurencijsko vijeće Bosne i Hercegovine (u daljem tekstu: Konkurencijsko vijeće) je dana 26.7.2022. godine, pod brojem: UP-03-26-1-017-1/22 zaprimilo Prijavu koncentracije (dalje u tekstu: Prijava) privrednog subjekta „Preduzeće za proizvodnju i promet vode Vlasinka“ doo Beograd, Republika Srbija (dalje u tekstu: Vlasinka ili Podnosilac prijave), koja se odnosi na kupovinu 100% udjela u osnovnom kapitalu privrednog subjekta „Homoljska voda“ doo Neresnica, Kučevo, Republika Srbija.

Privredni subjekt Vlasinka, prijavu koncentracije Konkurencijskom vijeću podnio je putem punomoćnika advokata Vesne Stevanović, Nikole Tesle 10, 76300 Bijeljina i advokata Miloša Stevanovića, Ul. Simeuna Đaka 21, 78000 Banja Luka (dalje u tekstu: Podnosilac prijave).

Uvidom u podnesenu Prijavu, Konkurencijsko vijeće je utvrdilo da ista nije kompletna u smislu člana 30. stav (1) Zakona o konkurenciji („Službeni glasnik Bosne i Hercegovine“, broj 48/05, 76/07 i 80/09) (dalje u tekstu: Zakon o konkurenciji) i čl. 9 i 11. Odluke o načinu podnošenja prijave i kriterijima za ocjenu koncentracija privrednih subjekata („Službeni glasnik Bosne i Hercegovine“, broj 34/10), te je aktima broj: UP-03-26-1-017-2/22 dana 10.8.2022.godine, UP-03-26-1-017-5/22 dana 7.9.2022.godine i UP-03-26-1-017-7/22 dana 28.9.2022.godine, od Podnosioca prijave zatražena dopuna iste.

Podnosilac prijave istu je dopunio podnescima broj: UP-03-26-1-017-3/22 dana 22.8.2022. godine, UP-03-26-1-017-4/22 dana 2.9.2022.godine, UP-03-26-1-017-6/22 dana 23.9.2022.godine, UP-03-26-1-017-8/22 dana 3.10.2022.godine, UP-03-26-1-017-9/22 dana 7.10.2022.god i UP-03-26-1-017-12/22 dana 11.11.2022.godine.

Konkurencijsko vijeće je dana 25.1.2023. godine, Podnosiocu prijave izdalo Potvrdu broj: UP-03-26-1-017-27/22, o prijemu kompletne i uredne prijave, u smislu člana 30. stav (3) Zakona o konkurenciji.

Konkurencijsko vijeće je u postupku ocjene predmetne transakcije utvrdilo slijedeće činjenice:

Prijava je podnesena u propisanom roku u smislu člana 16. stav (1) Zakona o konkurenciji.

Podnosilac prijave je naveo da će zahtjev za ocjenu koncentracije osim u Bosni i Hercegovini podnijeti i nadležnim organima za zaštitu konkurencije u <sup>1</sup>(..)\*\*.

### ***1. Učesnici predmetne transakcije***

Učesnici transakcije su privredni subjekt „Preduzeće za proizvodnju i promet vode Vlasinka“ doo Beograd, Republika Srbija i privredni subjekt „Homoljska voda“ doo Neresnica, Kučevo, Republika Srbija.

#### ***1.1. Privredni subjekt „Vlasinka“ doo Beograd, kao kupac***

Privredni subjekt Vlasinka sa sjedištem na adresi Batajnički drum br. 14-16, 11080 Zemun, je društvo ograničene odgovornosti registrovano u Registru privrednih subjekata Agencije za privredne registre Republike Srbije pod matičnim brojem: 100000985, za obavljanje pretežne djelatnosti proizvodnje osvježavajućih pića, mineralne vode i ostale flaširane vode.

**Vlasinka** je (..)\*\* u vlasništvu američke kompanije Barlan Inc. Atlanta, Džordžija (**Barlan Inc.**) i (..)\*\* u vlasništvu društva Coca Cola Hellenic Bottling Co. Srbija (**CCH Srbija**).

Društvo Barlan Inc. je u (..)\*\* vlasništvu društva The Coca Cola Export Corporation Delaware SAD, koje je u konačnici pod krajnjom, (..)\*\* kontrolom društva The Coca Cola Company SAD (**TCCC**), čija je pretežna djelatnost proizvodnja i distribucija koncentrata i sirupa za bezalkoholna pića.

Povezano društvo privrednog subjekta Barlan Inc. na teritoriji Bosne i Hercegovine, a koje je u njegovom (..)\*\* vlasništvu, jeste „Barlan BH“, društvo sa ograničenom odgovornošću za proizvodnju izvorske vode, Mostarsko raskršće bb, 71240 Hadžići, kao dio tzv. „Coca Cola sistema“ u Bosni i Hercegovini.

Društvo CCH Srbija, je potpuno zavisno društvo holandske kompanije CC Beverage Holdings II BV, koja je u (..)\*\* vlasništvu, odnosno krajnje kontrolisana od strane švajcarske kompanije Coca Cola HBC AG (**CCH**). CCH je kompanija čije se akcije prodaju na londonskoj berzi i gdje nijedan entitet odnosno subjekt nema udio koji je pojedinačno ili zajednički dovoljan za vršenje kontrole nad ovim subjektom, jer se (..)\*\* akcija nalazi u slobodnoj cirkulaciji (preostalih (..)\*\* ima TCCC i (..)\*\* Kar-Tess Holding).

#### ***1.1.1. Privredni subjekt „Homoljska voda“, kao ciljno društvo***

Privredni subjekt „Homoljska voda“ je društvo ograničene odgovornosti, sa sjedištem na adresi Homoljska 2A, 12242 Neresnica, Kučevo, registrovano u Registru privrednih subjekata Agencije za privredne registre Republike Srbije pod matičnim brojem: 17485962, za obavljanje pretežne djelatnosti proizvodnje osvježavajućih pića, mineralne i ostale flaširane vode.

Ciljno društvo nije vršilo plasman svojih proizvoda na teritoriji Bosne i Hercegovine.

Privredni subjekt „Homoljska voda“ je društvo pod (..)\*\* kontrolom privrednog subjekta Allied Beverages Adriatic doo Beograd-Zemun, Republika Srbija (**ABA**), registrovanog u Registru privrednih subjekata Agencije za privredne registre Republike Srbije pod matičnim brojem: 21357472, za obavljanje pretežne djelatnosti proizvodnje osvježavajućih pića, mineralne i ostale flaširane vode.

---

<sup>1</sup>(..)\*\* podatak predstavlja poslovnu tajnu

Privredni subjekt **ABA**, kao **prodavac** u predmetnoj transakciji, u (..)\*\* je vlasništvu privrednog subjekta **Barlan Inc**, a samim tim pod indirektnom, ali potpunom kontrolom krovnog društva **TCCC**.

## **2. Pravni osnov predmetne transakcije**

Pravni osnov transakcije je Ugovor o kupovini udjela zaključen dana 8.7.2022. godine, između privrednog subjekta „Preduzeće za proizvodnju i promet vode Vlasinka“ doo Beograd, Republika Srbija (**Vlasinka**), kao kupca i Allied Beverages Adriatic doo Beograd-Zemun, Republika Srbija (**ABA**), kao prodavca.

Ugovor se odnosi na kupovinu 100% udjela u privrednom subjektu „Homoljska voda“, koji je u 100% vlasništvu privrednog subjekta ABA.

## **3. Ocjena predmetne transakcije**

Član 12. Zakona o konkurenciji propisuje šta se sve smatra koncentracijom, dok su članom 14. Zakona propisani uslovi pod kojim su učesnici koncentracije obavezni podnijeti prijavu Konkurencijskom vijeću.

Analizom dostavljenih podataka i dokumentacije, Konkurencijsko vijeće je utvrdilo da predmetna transakcija po svom obliku ne predstavlja koncentraciju u smislu člana 12. stav (1) Zakona.

Naime, podnosilac prijave, privredni subjekt Vlasinka, kupuje 100% udjela u ciljnom društvu „Homoljska voda“ od privrednog subjekta ABA, pri čemu je Vlasinka pod zajedničkom kontrolom privrednih subjekata TCCC i CCH (..)\*\*, dok je privredni subjekt ABA pod krajnjom (..)\*\* kontrolom društva TCCC. Znači da je u konačnici, društvo TCCC posredno vlasnik (..)\*\* Vlasinke kao kupca i (..)\*\* vlasnik ABA, kao prodavca, te se može smatrati da se u predmetnoj transakciji radi o korporativnoj reorganizaciji, tj. o promjeni koja ne dovodi do posljedica značajnih iz ugla zaštite konkurencije, već samo do promjena u obliku kontrole nad ciljnim društvom, gdje već postoji vertikalna povezanost u smislu vlasničke strukture i kontrole.

Dakle, nakon provođenja transakcije ciljno društvo će biti posredno zajednički kontrolisano od strane privrednih subjekata TCCC i CCH, dok je prije transakcije ciljno društvo preko ABA bilo pod posrednom pojedinačnom kontrolom društva TCCC, što znači da se nad ciljnim društvom mijenja oblik kontrole, iz pojedinačne u zajedničku. Nakon provedene transakcije društva TCCC i CCH posredno će posjedovati po 50% udjela u ciljnom društvu i vršiti zajedničku kontrolu nad istim.

Na temelju navedenog, privredni subjekt Vlasinka, nije bio u obavezi podnijeti Prijavu, te je Konkurencijsko vijeće odlučilo kao u dispozitivu ovog Zaključka.

## **4. Administrativna taksa**

Podnosilac prijave na ovaj Zaključak, u skladu s članom 2. Tarifni broj 108. tačka d) Odluke o visini administrativnih taksi u vezi s procesnim radnjama pred Konkurencijskim vijećem („Službeni glasnik BiH“, br. 30/06 i 18/11) dužan je platiti administrativnu taksu u ukupnom iznosu od 1.000,00 KM u korist Budžeta institucija Bosne i Hercegovine.

## **5. Pouka o pravnom lijeku**

Protiv ovog Zaključka nije dozvoljena žalba.

Nezadovoljna strana može pokrenuti upravni spor pred Sudom Bosne i Hercegovine u roku od 30 dana od dana prijema, odnosno objave ovog Zaključka.

**Predsjednik**

**Nebojša Popić**